



樂城集卷第十五

詩八十五首

送陳侗同年知陝府

上書乞江淮得請歸關河所得非所願親友或相訶  
丈夫志四方所遇常逶迤况當國西屏形勝古來多  
崑渠湧北郭華岳垂東阿羗虜昔未平驛騎如飛梭  
間諜時出沒關梁苦誰何爾來一清淨西望多麥禾  
魏絳方和戎先零正投戈秦人釋重負道路聞行歌  
便當卧齋閣次第除網羅時時一嘯咏未用勤催科  
諸孤寄吳越食口如鴈鶩時分橐中金何必手自摩

次韻李曼朝散得郡西歸晉別二首

風波定後得西歸，烏鵲喧呼里巷知。  
未熟黃梁驚破夢，相看白髮信乘危。  
豚肩尚有冬深味，蠶器應逢市合時。  
父老爲公留臘酒，不須猶唱式微詩。  
懷印徒行尚故衣，邸中掾史見猶疑。  
千人不塚鄉關動，五馬行春兩澤隨。  
醉裏墜車初未覺，道中破甑復誰悲。  
西行漫遣親朋喜，早賦陶翁歸去詩。

送程建用宣德西歸

昔與君同巷，參差對柴荆。  
艱難奉老母，弦歌教諸生。  
黎藿飽臧獲，布褐均弟兄。  
貧賤理則窮，禮義日益明。

我親本知道，家有月旦評。  
逡巡戶牖間，時聞歎息聲。  
善惡不可誣，孝弟神所聽。  
我見此家人，處約能和平。  
它年彼君子，豈復地上行。  
爾來三十年，遺語空自驚。  
松阡映天末，苦淚綠冠纓。  
子親八十五，皤然老人星。  
安輿及祿養，平反慰中情。  
月俸雖不多，足備甘與輕。  
今年復考課，得秩真代耕。  
倚門老鶴望，策馬飛鴻征。  
歸來歲云莫，手奉屠蘇觥。  
我詩不徒作，以遺鄉黨銘。

君昔嘗與君與弊廬東西相望武昌君見其家事知非貧賤人也此語未嘗語人悅作三十年笑因若西歸作詩言之不竟流涕

次韻子瞻杜介供奉送魚

天街雪霽初通駟禁籞冰開漸躍魚十尾煩君穿細  
柳一杯勸我老青疏寒樽獨酌偶逢客佳句相酬不  
用書江海歸來叨禁近空令同巷往來踈

次韻子瞻招王遽朝請晚飲

矯矯公孫才不貧白駒衝雪喜新春忽過銀闕迷歸  
路誤認瑤臺尋故人訪我不嫌泥正滑番君深愧酒  
非醇歸時九陌鋪寒月清絕空教僕御羶

子瞻與李公麟宣德共畫翠石古木老僧謂  
之懋寂圖題其後

東坡自作蒼蒼石留取長松待伯時只有兩人嫌未

足更收前世杜陵詩

王君貺宣徽院詞三首

妙年收賈傳白首貴王陽志氣文章在功名歲月長  
遺孫依舊德故吏滿諸方河朔三持節斯民定不忘

又

謫墮神仙侶飛翔鸞鳳姿舊逢黃石老陰許赤松期  
歷歷僧伽記申申鄧傳詞翻然歸海嶠無復世人知

公少年過泗州於僧伽塔中見一老僧謂公歸味祖  
墓有白兔者君當第一人及第已而果然既登科見  
張鄧公為公言吾為射洪令尉補得一一人疑其行劫  
吾竟其非是釋之問其所從來則山中隱者也以藥  
遺我因服此藥可以終天年而無病且約我貴極人  
臣今子方且貴慎勿答辱道人公終身用其言職佐

公於大名親見公言之

從軍在河上伏鉞喜公來幕府方閑暇歌鍾得縱陪  
它年老賓佐過國泣樓臺猶有墳碑在仍令故客開

今樞密安公厚卿昔與同在此幕府公家方求厚卿作墓碑

### 送杜介歸揚州

揚州繁麗非前世城郭蕭條却古風尚有花畦春雨  
後不妨水調月明中東都甲第非嫌汝北牖羲皇自  
屬翁渭洛放船經月事急先鷓鴣送芳叢

次韻子瞻與鄧聖求承旨同直翰苑懷武昌

### 西山舊遊

我遊齊安十日回東坡桃李初未栽扁舟亂流入樊  
口山雨未止淫黃梅寒溪聞有古精舍相與推挽登  
崔嵬山深縣令喜客至寺荒蔓草生經臺黃鵝白酒  
得野餽藤床竹簟無纖埃可憐遷客畏人見共怪青  
山誰爲堆行驚晚照催出谷中止亂石傾餘壘古今  
相望兩令尹謂元結與鄧君也文詞灑落千山隈野人豈復  
識遺趣過客時爲剡蒼苔五年留滯屐齒禿一朝揮  
手船頭開玉堂却憶昔遊處笑問五柳應彫摧滿朝  
文士蚤貴達馮凌霄漢乘風雷入叅祕殿出華省何  
曾著足空山來漂流邂逅覓遺躅耳中尚有江聲哀

送楊孟容朝奉西歸

三十始去家四十初南遷五十復還朝白髮正紛然  
故人從西來鞍馬何聯翩握手得一笑喜我猶生全  
別離多憂患寧覺非因緣惟餘歸耕計粗有山下田  
又糜太倉粟空愧鄉黨賢老兄富治行令德齊高年  
幸此民事清未厭軍壘偏父老攜壺漿稚子迎道邊  
應有故相識問我何當旋君恩閔衰病歸駕行將鞭

次韻孔武仲學士見贈

羨君耽讀書日夜論今古雖復在家人不見釋手處  
意求五車盡未惜雙目苦蓬萊倚霄漢簡牘充棟宇

學成擅困倉筆落走風雨破籠閉野鶴短草藏文虎  
鬢鬚忽半白兒女無復乳知君不能薦愧我終何補  
偶來相就談日落久未去歸鞍得新詩佳句爛如組  
古風棄彫琢遺味比樂府且復調墳笈冷然五音舉

送家定國朝奉西歸

我懷同門友勢如曉天星老去髮垂素隱居山更青  
退翁聯科第俯仰三十齡仕官守鄉國出入奉家庭  
鵠鷺性本靜芷蘭深自馨新詩得高趣衆耳昏未聽  
笑我老憂患奔走如流萍冠裳強包裹齒髮坐彫零  
晚春首歸路朱轡照長亭縣令迎使君綵服導輜駟

長歎或垂涕平反知有命此樂我已亡雖達終不寧  
次韻劉貢父省上示同會二首

流落江湖東復西歸來未洗足間泥偶隨鵬翼培風  
上時得衙香滿袖攜落筆逡巡看儼直醉吟清絕許  
分題相望魯衛雖兄弟終畏鄰封大國齊

掖垣不復限東西賓客來衝霧雨泥白酒黃封開歛  
艷朱纓青龍落提攜五花愧我連書判三道高君免  
試題誰遣松蒿同一谷凌雲他日恐難齊

次韻孔武仲三舍人省上

君不見西都校書宗室叟東魯高談鼓瑟手偶然同

我西掖垣並立曉班分左右龍文百斛世無價屬一  
瓦釜枵然但升斗諸兄落落不可望兩季幸背分餘  
光大孔奮飛自南鄉聯翩羣鴈相追翔渠家冠蓋尤  
堂堂

送顧子敦奉使河朔

去年送君使河東今年送君使河北連年東北少安  
居慷慨憐君色自得河流西決不入土千里汗漫被  
原隰壯夫奔亡老稚死粟麥無苗安取食君憂臣辱  
自古然自詭過門三不入忠誠一發鬼神輔心念既  
通謀計集堤防旋立村落定波浪欲收蛟蜃泣二年

歸國未為久故舊相看髮猶黑成功豈在延世下好  
勇真令腐儒服此時為國頌河平當使君名長不沒  
席上再送

人言虎頭癡湧作河朔遊黃河六七月不辨馬與牛  
單車徑北渡橫身障西流虎頭亦不癡志在萬戶侯  
徜徉歷三邊歸借坐上籌腰垂黃金印不受白髮羞  
此計雖落落但問有志不臨岐且一醉行役方未休

次韻孔文仲舍人醉藥

蒼虵凍不死輕素暖仍歸落藥時吹面繁香自撲帟  
光疑直照夜枝軟或牽衣似厭風霾苦應思霧雨霏

開樽迎最盛掃地見初稀賴有清陰在金波肯發揮

送錢承制赴廣東都監

家聲遠繼河西守遊宦多便嶺外官南海無波閑闕  
舸北堂多暇得羞蘭忽聞常棣歌離索應寄寒梅報  
好安它日扁舟定歸計仍將犀玉付江湍

次韻曾子開舍人四月一二日扈從二首

萬人齊仗足聲勻翠輦徐行不動塵夾道謹呼通老  
穉從官雜選數徐陳旌旗稍放龍蛇卷旒冕初看日  
月新天遣雨師先灑道農夫不復誤占辛農家常以

辛深則變熟今年正月八日得辛而雨不  
申應駕未出一日初得雷雨變始有望



衣冠雙日欵蓬萊  
簾脫瓊鉤扇不開  
清曉連驚三殿  
啓翠華遙自九天來  
晨光稍稍侵黃蓋  
瑞霧霏霏著  
禁槐千雨翟車觀  
禮罷歸時滿載德風迴  
是日內外命婦皆會  
景炎仰瞻三宮肅然雍穆不言而化諸公之家有能言之者

再和

病起江南力未勻  
強將冠劍拂埃塵  
木雞自笑真無用  
芻狗何勞收已陳  
行從纓旗風日細  
側聽廟樂管絃新  
誰知四載勤勞後  
併舉成功祚泣辛  
宸心惻惻念汗萊  
南籞西池閉不開  
長樂鳴鞘千乘出  
顧成薦鬯萬方來  
從臣暗泣新宮柳  
父老行依輦

路槐雙闕影斜朱  
戶啓都人番看屬車回

次韻張昌言給事省中直宿

還家未暇拂塵衣  
攜被重來趁落暉  
省戶鳴騶久分散  
宮槐栖鵲共翻飛  
周廬見月風霾靜  
斜漢橫空星斗稀  
多病心身怯清禁  
故山依約夢西歸

次韻貢父子開直宿

擲簡捭毫氣吐虹  
興餘庭藥詠殘紅  
今宵文字知無幾  
軒睡簾中笑二公

去年冬轍以起居郎入侍  
邇英講不逾時遷中書舍人  
雖忝冒愈深而瞻望清光與日俱

遠追記當時所見作四絕句呈同省諸公

邈英肅肅曉霜清玉宇特聞稿葉零風過都城吹廣  
內萬人笑語落中庭

銅鉼灑遍不勝寒雨點勾圓凍未乾回首矐矐朝日

上槐龍對舞覆衣冠邈英前有雙槐甚高而柯葉拂地狀若龍蛇講官進對其下

早歲西廂跪直言起迎天步晚臨軒何知老侍曾孫

聖欲泣龍髯吐復吞韓昔奉制策坐於崇政西廊蓋邈英之比也是日晚仁皇自延

和步入崇政過所試幄前瞻望天表最為親近

講罷淵然似不勝詩書默已契天心高宗問答終垂  
世未信諸儒測淺深

次韻張問給事喜雨

已收蠶麥無多日旋喜山川同一雲禾黍趁時青覆  
壠池塘流潤渌先文兩宮尚廢清晨集中禁初消永  
夜薰倉粟半空民望足深耕疾耨肯忘君

次韻宋構朝請歸守彭城

得郡迎親願不違書來無復寄當歸馬馳未覺西南  
遠烏哺何辭日夜飛湖水欲平官舍好茶征初復訟  
珉稀平反聞道加食飯五袴應須換破衣

次韻劉貢父西掖種竹

竹迷誰定知迷否趁取滂沱好雨初栽向鳳池吹律

處斲從芸閣殺青餘迎風一嘯朝回早弄月相差直  
宿跡應怪籍咸林下客相看不飲作除書  
仲馮方作左史必與

貢父並直於此

### 次韻劉貢父省中獨直

簾深巧為隔朝暎竹密時能引雀喧朝罷宿醒還續  
夢靜中諸妄稍歸根坐曹聞道仍分省出沐誰當與  
並軒竹簟茅簷它日事重因遺詠記君恩

### 得告家居次韻貢父見寄

君恩賜告許歸來雨後中庭有綠苔起問日高三丈  
久卧聞車過九門開泥封連日傳新語腕脫知君有

軼才時八十二兩待得晴乾追後乘未應塵土熱  
如灰

### 黃幾道郎中同年挽詞二首

溫恭天賦此心良惠愛人知政術長井水無波任鉞  
綆牛刀投隙應宮商分符出遍名城守攜被歸從華  
省郎不到汝陰遺恨遠坐令湖水減清光

早歲相從能幾時准陽花發正游嬉鳴弓矍相人如  
堵席地滄浪柳作帷十載舊遊真是夢一時佳客尚

存誰逆聞葬日車千兩漬酒絲中寄一悲

轡昔并幾道相遇於

陳陳守張聖民相与游從甚密連今將三十年當時  
賓客在者少矣而幾道復化去言之懷惻無已

和王定國寄劉貢父

度嶺當年惜遠行過淮今日似前生留連秋思江侵  
海搖蕩春心花滿城欲寄尺書慵把筆偶聞佳句獨  
含情何時復看清虛會醉聽箏箏促琵琶聲

故濮陽太守贈光祿大夫王君正路詞二首

落落承平佐英英嗣世風芝蘭託庭戶鸞鵠峙椅桐  
結客賢豪際傾財緩急中悲傷聞故老淪謝未衰翁  
吳中試良守濮上繼嘉聲平賦權家恨蠲租盜俗清  
家貧久未葬身去獨留名天報多男子終存好弟兄

韓幹三馬

老馬側立鬃尾垂御者高拱持青絲心知後馬有爭  
意兩耳微起如立錐中馬直視翹右足眼先已動心  
先馳僕夫旋作奔佚想右手正控黃金羈雄姿駿發  
最後馬回身奮鬣直權奇圍人頓轡屹山立未聽决  
驟爭雄雌物生先後亦偶爾有心何者能忘之畫師  
韓幹豈知道畫馬不獨畫馬皮畫出三馬腹中事似  
欲譏世人莫知伯時一見笑不語告我韓幹非畫師

書郭熙橫卷

鳳閣鸞臺十二屏屏上郭熙題姓名崩崖斷壑人不

到枯松野葛相欹傾黃散給舍多肉食食罷起愛飛  
 泉清皆言古人不復見不知北門待詔白髮垂冠纓  
 袖中短軸纔半幅慘澹百里山川橫巖頭古寺擁雲  
 木沙尾漁舟浮晚晴遙山可見不知處落霞斷馬俱  
 微明十年江海興不淺滿帆風雨通宵行投篙椽棧  
 便止宿買魚沽酒相逢迎歸來朝中亦何有包裹觀  
 闕圍重城日高因睡心有適夢中時作東南征眼前  
 欲擬要真物拂拭東絹付與汾陽生

題王生畫三蠶蜻蜒二首

飢蠶未得食宛轉不自持食蠶聲如雨但食無復知

老蠶不復食矯首有所思君畫三蠶意還知使者誰

又

蜻蜒飛翾翾向空無所著忽然逢飛蚊驗爾飢火作  
 一飽因竹粘凝然反冥寞若無飢渴患何貴一簞樂

贈寫真李道士

君不見景靈六殿圖功臣進賢大羽東西陳能令將  
 相長在世自古獨有曹將軍嵩高李師棹頭笑自言  
 弄筆通前身百年遺像誰復識滿朝冠劍多偉人據  
 鞍一見心有得臨牕相對疑通神十年江海鬢半脫  
 歸來俛仰慚簪紳一揮七尺倚牆立客來顧我誠似

君金章紫綬本非有綠簑黃蒔甘長貧如何畫作白衣老置之茅屋全吾真

次韻子瞻題郭熙平遠二絕

亂山無盡水無邊田舍漁家共一川行遍江南識天巧臨窻開卷兩茫然

斷雲斜日不勝秋付與騷人滿目愁父老如今亦才思一蓑風雨釣槎頭

次韻錢駟待制秋懷

壯心老自消秋思悲不怨中懷不堪七那用日食萬朝陽淨塗潦白露露草蔓夾衣搜故褚酒債積新券

徂猿便林藪冠帶愁檻圈夢追赤松游食我青精飯  
歸心久已爾佳句聊復勸近聞洮東將閒出邊馬健  
禪王坐受縛右袂行將獻念此愧無功歸歟適吾願

宿滎陽甯氏園

喧卑背城市曠蕩臨溪水車流沂絕壁河潤及桃李  
居人有佳思過客得新喜中橋一回顧欲入迷所自

滎陽唐高祖太宗石刻像 并叙

滎陽大海院高齋石像二高不數寸而姿製甚妙  
唐高祖爲鄴州刺史太宗方幼而病甚禱之即愈  
因各爲一碑刻彌勒佛且記其事至今皆在元祐

二年九月祭告永裕陵過而觀焉作小詩以授院僧

誰言膚寸像勝力妙人天欲療衆生病陰扶濟世賢  
身微須覆護眼淨照幾先豈為成功報猶應歷劫緣

次韻劉貢父從駕

一經空記弟傳兄舊德終慙比長卿扈駕聯翩來接  
武登科先後憶題名竹林共集連諸子棣萼相輝賴  
友生它日都門俱引去不應廣受徇華榮

次韻劉貢父和韓康公憶其弟持國二首

霜風琴瑟卷梧蕉燕處超然夜寂寥羽客信來丹鼎

具石淙夢斷水聲遙赤松作伴誰當見黃鵠高飛未  
易招劍履終身定何益勤勞付與沛中蕭

愛君憂世老彌深特操要須得失臨晚歲飛騰推有  
德故鄉安穩信無心小邦近似西山隱元氣終當北  
斗斟聖主方求三世舊老臣何止一遺簪

聞京東有道人號賀郎中者唐人也其徒有

識之者作詩寄之

賀老稽山去不還鏡湖獨掉釣魚船南來太白尋無  
處却作郎官又幾年岱下迎鸞驚典謁家山施藥愍  
耕田試窮脚力追行迹亦使今生識地仙

送家安國赴成都教授三絕

城西社下老劉君春服舞雩今幾人白髮弟兄驚我

在喜君浮宦亦天倫微之先生門人惟僕與子瞻兄復禮與退翁兄皆仕耳

垂白相逢四十年猖狂情味老俱闌論與頓似前賢

語莫作當年故目看

石室多年款誌平新書久溷里中生遺師今見朝廷

意文律還應似兩京

送歐陽辯

我年十九識君翁鬚髮白盡顴頰紅奇姿雲卷出翠

阜高論河決生清風我時少年豈知道因緣父兄願

承教文章踈略未足云舉止猖狂空自笑公家多士

如牛毛揚眉抵掌氣相高下客浚巡愧知已流枿低

昂隨所遭却來京洛三十載重到公家二君在伯亡

仲逝無由追淚落數行心破碎京城東西正十里兩

落泥深旱塵起衣冠纏繞類春蠶一歲相從知有幾

去年叔為尚書郎家傳舊業行有望今年季作澶淵

吏米塩騷屑何當起前輩今無一二存後來幸有風

流似黃河西行淤没屋桑柘如雲麥禾熟年豐事少

似宜君飽讀遺書心亦足

送韓康公歸許州



功成不願居身退有餘勇心安里閭適望益縉紳重  
朝為北闕辭莫犯南河凍人知踈公達王命顯父送  
百壺山泉溢千兩春雷動旋聞二季賢繼以一章控  
詔書未云可廷論已爭竦茲行迫寒食歸及掃先壠  
萬人擁道看一子腰金從爾曹勿驚嗟令德勸勤種  
三日上辛祈穀除日宿齋戶部右曹元日賦  
二絕句寄呈子瞻兄  
七度江南自作年去年年初喜奉椒槃冬來誤入文昌  
省連日齋居未許還  
今歲初辛日正三明朝春氣漸東南還家強作銀幡

會雪底蒿芹欲滿籃

北客南來歲欲除燈山火急萬人扶燈山例以北使見日立欲  
觀翠輦巡游盛深却南宮鎖鑰拘

次韻王欽臣祕監集英殿井

碧甃涵雲液銅瓶響玉除汲花擗點罷灑霧喚班初  
龍餅煎無數螭研滴有餘從官方醉飽一酌解清虛

集賢殿考試罷二首

振鷺紛紛未著行初從江海覘清光卷聲風雨中庭  
起筆勢雲煙累幅長病眼尚能分白黑衆毛空復數  
驪黃禁中已許公孫第得失何私物自忙

續坡集 卷十五 十六  
衰病相侵眼漸昏青燈細字苦勞神  
遍看大軸知無力聽誦竒篇賴有人  
前日鼓旗聞苦戰明朝雷雨出  
潛鱗毀廬困極唯思睡却憶登科以後身

問蔡肇求李公麟畫觀音德雲

好事桓靈寶多才顧長康何嘗爲人畫  
但可設竒將夕聚要當散能分慰所望  
清新二大士界我夜燒香

五月一日同子瞻轉對

羸病不堪金束腰水懷江河舊漁樵  
對床貪聽連霄雨奏事驚同朔旦朝  
大耿功名元自異中茅服食舊相要  
一封同上憐狂直詔許昌言賴有堯

次韻劉貢父題文潞公草書

鷹揚不減少年時墨作龍蛇紙上飛  
應笑學書心力盡臨池寫遍未裁衣

韓康公挽詩三首

閎闕元高世功名目發身堂堂揖真相  
矯矯出稠人許國心先定輕財物自親  
傳經此畜氏世世得良臣

又

耆年時一二新第闕西南好客心終在  
忘懷日縱談規模人共記風味我猶諸  
誰是羊曇首回車意不堪

又

師曠聞弦日相如作賦年雖慙衆人後貪值主文賢  
北道初聞召南江正遠遷平生闕親近遺恨屬新阡  
送王宗望郎中赴河東漕

春初戎馬掠河壩屬國倉呈不解鞍未免驅民餽邊  
食旋聞奉使輟郎官年高轉覺精神勝慮穩要令事  
業安持節近看葱嶺雪擁裘應慣馬門寒

送高士敦赴成都兵鈐

楊雄老病又思歸家在成都更向西邂逅王孫馳駟  
騎丁寧父老問耕犁禪房何處不行樂壁像君家有  
舊題德厚不妨三世將時平空自萬夫齊

鴻盧草堂圖

昔爲太室遊盧巖在東麓直上登封壇一夜蟹生足  
徑歸不復往巒壑空在目安知有才志舒卷不盈幅  
一處一盧生裘褐蔭喬木方爲世外人行止何須錄  
百年入篋笥犬馬同一束嗟子縛世累歸來有茅屋  
江千百畝田清泉映脩竹尚將逃姓名豈復上圖軸  
秦虢夫人走馬圖二絕

秦虢風流本一家豐枝穠葉映花雙欲分妍醜都無  
處夾道遊人空嘆嗟

朱幘玉勒控飛龍笑語喧譁步驟同馳入九重人不

見金鈿翠羽落泥中

韓幹二馬

玉帶胡奴騎且牽銀髮白鼻兩爭先  
入坊龍種知何數乞與岐邠並錦韉

試制舉人呈同舍諸公二首

垣中不減臺端峻池上來從柱下嚴  
同直舊曾連月

又整來還喜二公兼僕項并孫莘老同在諫垣并彭器資同在西掖直言已

許侵彈奏新告行聞振滯淹顧我龕官何所與西曹

只合論茶塩

早歲同科止六人中年零落半埃塵  
却將舊學收新

進幾誤今生是後身駢別都遺老驥沉埋祕府愧

潛鱗制科前輩今獨張公安道一憐君尚勝劉蕡在

白首諸侯呼上賓

次韻張去華院中感懷

登朝已老似王陽脫葉何堪霧雨涼  
案上細書憎蟻

黑禁中新酒愛鵝黃臨塔野菊偏能瘦  
倚檻青松解

許長仕宦不由天祿閣坐曹終日漫皇皇懶項自績溪除校書

即未至京除右司諫竟不入館故以為恨

送周思道朝議歸守漢州三絕

早緣民事失茶官解印重來十二年  
羨惡一周還自

復始知東里解言天

梓漢東南甲乙州同時父子兩諸侯王孺時出守梓州它年

我作西歸計兄弟還能得此不

酒壓郾筒憶舊酤花傳丘老出新圖崇州官酒蜀中推第一趙昌畫

花尊做个文播亦西川所無也此行真勝成都尹直為房公百頃湖

樂城集卷第十五

樂城集卷第十六

詩一百二十首

程之元表弟奉使江西次前年送赴楚州韻

贈別

送君守山陽羨君食淮魚送君使鍾陵羨君江上居

憐君喜為吏臨行不歛歔紛紛出歌舞綠髮照瓊梳

歸鞍蹈涼月倒盡清樽餘嗟我病且衰兀然守文書

齒踈懶食肉一飯甘青蔬愛水亦已乾塵土生空渠

清貧雖非病簡易由無儲家使赤脚嫗何煩短轅車

君船繫東橋茲行尚徐徐對我竟不飲問君獨何歎

表弟程之邵奉議知泗州

馬有千里足所願百里程馬心自爲計安用終日行  
何人志四方欲買千金輕吾弟有雋才見事心眼明  
二年坐北部萬口傳佳聲談笑頑狡伏何曾用敲榜  
艱難得銅虎洗眼長淮清民事不足爲但當食魚烹  
負重貴餘力過飽多傷生不見大路馬垂頭畏繁纓

次韻子瞻書黃庭內景卷後贈蹇道士拱辰

君誦黃庭內外篇本欲洗心不求仙夜眎片月墮我  
前黑氛剝盡朝日妍一暑一寒久自堅體中風行上  
通天亭亭孤立孰傍緣至哉道師昔云然旣已得之

戒不傳知我此心未虧騫指我嬰兒藏谷淵言未絕  
口行已旋我思其言夜不眠

次韻子瞻好頭赤

沿邊壯士生食肉小來騎馬不騎竹翻然赤手挑青  
絲捷下巔崖試深谷牽入故關榆葉赤未慣中原暖  
風日黃金絡頭依圉人俛聽北風懷所歷

送葆光舉師游廬山

建成市中有狂人縱酒罵市無與親敲門訪我何途  
巡頭蓬面垢氣甚真截河引水登崑崙下洗尺宅骨  
髓勺告我入室要自門仙翁道師豈遺君歸來挿足

九陌塵獨遊凝祥芳草春蕭然孤鶴鳴鷄羣予欲不  
死存谷神海山微明朝日暎丹成寄子勿妄云出入  
無朕窮無垠相思一笑君乃信

同子瞻次梅聖俞舊韻題鄉舍木山

江槎出没浮犀牛波濤掀天谷爲洲江寒水落驚霜  
秋危根瘦節鳴寒流脆朽吹去誰鐫鏤連峯疊嶂立  
酋酋吾家此山不易得十年棄置空自尤猿號鶴唳  
豈無意委蛇恠我懷羔裘西歸父老拍手笑笑憶翁  
子躬薪樵去特三山今有五不問故園惟一丘

次韻子瞻送千乘千能

少年食糠覈吐去願一官躬耕遇歛獲不知以爲歡  
謂言一飛翔要勝終屈蟠朝廷未遑入江海失所安  
多憂變華髮照影慙雙鸞恩從萬里歸獨喜入節完  
日食太倉米篋中有餘純奇窮不當爾自信處此難  
長女聞孀居將食淚滴槃老妻餽憂患悲吒摧心肝  
西飛問黃鵠誰當救飢寒二子憐我老輦致心一寬  
別久得會合喜極成辛酸忽聞倚門望有書驚歲闌  
深情見緩急欲報非琅玕勸爾勤孝友慎毋慕衣冠  
淵渟自成井放瀉當生瀾豈有白雪駒舉足無和鑿

題王詵都尉畫山水橫卷二首

摩詰本詞客亦自名畫師平生出入朝川上鳥飛魚  
泳嫌人知山光益益著眉睫水聲活活流肝脾行吟  
坐詠皆目見飄然不作世俗詞高情不盡落縑素連  
峯絕澗開重帷百年流落存一二錦囊全軸酬不訾  
誰令食肉貴公子不學父祖驅熊羆細氈淨几讀文  
史落筆璀璨傳新詩青山長江豈君事一揮水墨先  
淋漓手中五尺小橫卷天末萬里分毫釐謫官南出  
止均類此心通達無不之歸來纏裹任統縉天馬性  
在終難羈人言摩詰是前世欲比顧老疑不癡桓公  
崔公不可與但可與我寬衰遲

憐君將帥雖有種多君智惠初無師篇章俊發已可  
駭丹青妙絕當誰知自言五色苦乱日况乃旨酒長  
傷脾手狂但可時弄筆口病未免多微詞歌鐘一散  
任池館幅巾靜坐空書帷偶從禪老得真趣此身不  
足非財訾世間翻覆岸爲谷猛獸相食虎與罷逝將  
得意比春夢獨取妙語傳清詩眼看官釀瀉酥酪未  
與村酒分醇滴解鞍駿馬空伏櫪寄書黃狗閑生鬢  
江山平日偶有得不自圖寫渾忘之臨窻展卷聊自  
適磐礴豈復冠裳羈欲乘漁艇發吾興願入野寺嗟  
兒癡行纏布襪雖已具山中父老應嫌遲



我昔得罪遷南夷性命頃刻存  
篙師風吹波蕩到官舍  
號呼誰復相聞知  
小園畜蟻防橘蠹橘性其多蠹南人畜蟻於  
中。蟻緣木食蠹。雖鄰家柯葉。相接而蟻不相過。亦一異耳。  
空庭養蜂收蜜脾  
讀書一生空自笑  
賣鹽竟日那復詞  
城中清溪可濯漱  
城上連峯堪幕帷  
十千薄俸聊足用  
魚多米賤憂無訾  
東坡居士最岑寂  
岌然深藂見狐羆  
坐隅止鵬偶成賦  
槃中食蟊特作詩  
憐君富貴可炙手  
一時出走羞斃醜  
澤傍憔悴凡幾歲  
胷中芥蒂無一釐  
江山別來今久矣  
不獨能言能畫之  
同朝執手不容久  
笑我野馬初受羈  
袖中短卷墨猶濕  
傍人笑指吾儕癡  
方

求農圃救病它年未用譏樊遲

次韻子瞻十一月旦日鎖院賜酒及燭

銅鑲玉鎖閉空堂  
腕脫初驚筆札忙  
紅燭遙憐風雪暗  
黃封微瀉桂椒香  
光明坐覺幽陰破  
溫暖深知覆育長  
明日白麻傳好語  
曼聲微繞殿中央

送周正孺自考功郎中歸守梓潼蕪簡呂元

鈞三絕

白髮熙寧老諍臣  
凜然心膽大於身  
吾儕坐看馮唐去  
誰起雲中廢棄人

十年符竹守吾州  
故吏相逢嘲土牛  
毋謂徐公不堪

用諸人自與世沉浮  
東道如聞近稍安乘驄按部凜生寒忽逢太守能相  
下俱是從來言事官

雪中訪王定國感舊

昔游都城歲方除飛雪紛紛落花絮徑走城東求故  
人馬蹄旋沒無尋處翰林詞人呼巨源笑談通夜倒  
清樽住在城西不能返醉卧吉祥朝日暎相逢却說  
十年事往事皆非隔生死惟有飛雲似昔時許君一  
醉那須起蘭亭俛仰迹已陳黃公酒壚愁殺人君知  
聚散翻覆手莫作吳楚乘朱輪

次韻王定國見贈

枯木無枝不記年寒灰誰遣強吹然南遷不折知非  
妄未老求閑愈覺賢屢出詩章新管籥偶開畫卷小  
山川簿書填委慙若甚撥去歸來粗了眠

王子雉龍圖挽詞

帝子乘鸞已列仙遺芳畱得眾孫賢俊科蚤與寒儒  
競禁從終償白髮年輦路聯鑣驚往事圃田回首泣  
新阡舊聞推歷知天命看熟黃梁定洒然

次韻李秀才來別子瞻仍謝惠馬

小床卧客笑元龍彈鋏無輿下舍中五馬不辭分後

乘輕裘初許弊諸公隨人射虎氣終在徒步白頭心  
頗同遙想據鞍橫架處新詩一一建安風

呂司空挽詞三首

少年輕富貴一意在詩書共恨經綸晚纔收老病餘  
寡言知德勝善應本中虛卒相承平業謳歌元祐初

又

將相家聲近勲名晚歲隆給扶安舊德賜府壓羣公  
不見彌縫迹空推翼戴功山公舊多可寒士泣清風

又

罷郡來清潁微官憶宛丘潁垣那可住隱几若將休

復起民欣願全歸天不留世間反覆手有德竟無憂

公羅潁川退居於陳讌  
為陳李官時請見焉

范蜀公挽詞三首

能言人盡爾有立世終稀憂國常先衆謀身亦勇歸  
見奇初或笑要極未應非僅似西山老終身止食薇

又

賦傳長嘯久書奏罇鍾新共歎文章手終為禮樂人  
遺風滿臺閣好語落簪紳欲取褒雄比終非骨鯁臣

又

劍外東來日城西却住年高齋留寓宿旅食正蕭然

謂愜聞投石詩新看涌泉清樽寄苦淚一洒葉墳前  
范百嘉百歲昆仲挽詞二首

少年何敏銳才氣伏諸生展卷五行下揮毫萬字傾  
百年殊未艾一病竟無歲誰謂從夫子同開鬱鬱城

又

季子尤高爽顏家早哭回白頭生便爾黃壤遽相催  
舊草誰收拾新松剩挿栽悲傷有伯氏諸子尚嬰孩

安厚卿樞密母夫人挽詞二首

家起側微中身兼富貴終慈仁本宜壽勤約自成風  
大府寧居久名邦賜沐雄共傳生子福仍指讀書功

又

早歲參戎幙開門對粉牆初聞寡兄弟共羨好姑章  
一別飛騰速全歸福祿長遺芳在子舍它日望巖廊

題李公麟山莊圖二十首并叙

伯時作龍眠山莊圖由建德館至垂雲泝著綠者  
十六處自西而東凡數里巖崿隱見泉源相屬山  
行者路窮於此道南溪山清深秀峙可游者有四  
曰勝金巖寶華巖陳彭澹鵲源以其不可緒見也  
故特著於後子瞻既爲之記又屬轍賦小詩凡二  
十章以繼摩詰輞川之作云

建德館

龍眠淥淨中微吟作雲雨幽人建德居知是清風主

墨禪堂

此心初無住每與物皆禪如何一丸墨舒卷化山川

華嚴堂

佛口如瀾翻初無一正定畫作正定看於何是佛性

雲薌閣

清溪便種稻秋晚連雲熟不待見新春西風薌自足

發真塢

山開稍有路水放亦成川游人得所息真意方澹然

薌茅館

山居少華麗牽茅結淨屋此間不受塵幽人亦新沐

瓔珞巖

泉流逢石缺脉散成寶網水神瓔珞看山是如來想

棲雲室

石室空無主浮雲自去來人間春雨足歸意帶雷風

秘全庵

世道自破碎全理未常違溪山亦何有求覺平日非

延華洞

共恨春不長逡巡就搖落一見洞中天真知世間惡

澄元谷

石門日不下潭鏡月長臨細細溪風渡相看識此心

雨花巖

巖花不可攀翔藥久未墮忽下幽人前知子觀空坐

泠泠谷

層崖落飛泉微風泛喬木坐遣谷中人家家有琴筑

玉龍峽

白龍晝飲潭脩尾掛石壁幽人欲下看雨霽晴相射

觀音巖

倚崖開翠屏臨潭置苔石有所獨無人君心得未得

垂雲泚

木見垂雲泚其如歸興何路窮雙足熱爲我洗磐陀

勝金巖

置馬步巖間巖前得平地肴蔬取行簾粗飽有餘味

寶華巖

團團寶華巖重重蔭珎木歸來得商鼎試鬻溪邊綠

陳彭滌

蒼壁立精鐵縣泉瀉天紳山行見戶久指與未來人

鵲源

溪深龜魚驕石瘦椿楠勁借子木蘭船寬我芒鞋病

四時皆記  
伯明所畫

將使契丹九日對酒懷子瞻兄并示坐中

黃華已向初旬見白酒相携九日嘗  
黃少一枝心自覺春同斗粟味終長  
蘭生庭下香時起玉在人前坐亦涼  
千里使胡須百日蹙將中子治書囊

題王詵都尉設色山卷後

還君橫卷空長歎問我何年便退休  
欲借巖阿著茅屋還當溪口泊漁舟  
經心蜀道雲生足上馬胡天雪滿裘  
萬里還朝徑歸去江湖浩蕩一輕鷗

次韻子瞻相送使胡

朔雪胡沙試此身青羅便面紫狐巾  
擁燴代北隨飛馬頓足江東有卧麟  
欺酒壺冰將送臘照溪梅萼定先春  
漢家五餌今方驗更愧當年歎息人

歐陽文忠公夫人挽詞二首

先生才蓋世家事少經心流落初相偶  
委蛇志益深功名入圖史文字刻璆琳  
有助知由內騶虞欲重吟

又

好禮忘耆老持家歷盛衰謹嚴終致一  
貧富各從宜晚歲仍聞道臨終竟不疑  
外人傳一二猶得載銘詩

歐陽伯和仲純挽詞二首

之人雖蚤病對客每清言不信瘼爲累要稱學有原  
蘧蔭視名器果蒞指乾坤長短何須問傳家已抱孫

又

仲氏氣無前爲文思湧泉飄然落筆地時出疾邪篇  
柁榦要經雪驂驢待著鞭淒涼悲故客不及見華顛

奉使契丹二十八首

次莫州通判劉涇韻二首

北國亦知岐有夷何嘗烽火報驚危擁旌絕漠聞嘉  
語緩帶臨邊出好詩約我一樽迎嗣歲待君三館已  
多時從今無事唯須飲文字聲名人自知

平世功名路甚夷不勞談說更騎危早年拭目看成  
賦近日收心聞琢詩古錦屢開新得句弊貂方競苦  
寒時南還欲向春風飲塞柳凋枯恐未知

贈知雄州王崇極二首

趙北燕南古戰場何年千里作方塘煙波坐覺胡塵  
遠皮幣遙知國計長勝處舊聞荷覆水此行猶及璧  
經霜使君約我南來飲人日河橋柳正黃

至雄州

生辰使例以人日還

城裏都無一寸閑城頭野水四汗漫與君但對湖光  
飲又病偏須酒令寬何氏溝塍布棋局李君智略走



珠槃應存父老猶能說有意功名未必難

贈右番趙侍郎

霜湏顧我十年兄朔漠陪公萬里行駢馬貂裘寒自  
煖連牀龜息夜無聲同心便可忘苛禮異類猶應服  
至誠行役雖勞思慮少會看黎棗及春生

古北口道中呈同事二首

前一首呈趙侍郎  
後一首呈副使

獨卧繩牀已七年往來殊復少縈纏心游幽闕鳥飛  
處身在中原山盡邊梁市朝回塵滿馬蜀江春近水  
浮天枉將眼界疑心界不見中宵氣浩然  
笑語相從正四人不湏嗟歎久羣離及春煮菜過邊

郡賜火煎茶約細君目暖山蹊冬未雪寒生胡月夜  
無雲明朝對飲思鄉嶺夷漢封疆自此分

絕句二首

亂山環合疑無路小徑縈回長傍溪髮髯夢中尋蜀  
道興州東谷鳳州西

日色映山才到地雪花鋪草不會消晴寒不及陰寒  
重攬篋猶存未著貂

過楊無敵廟

行祠寂寞寄關門野草猶知避血痕一敗可憐非戰  
罪太剛嗟獨畏人言馳驅本爲中原用嘗享能令異

域尊我欲比君周子隱誅彤聊足忠寬

燕山

燕山如長蛇千里恨夷漢首銜西山麓尾掛東海岸  
中開哆箕畢未路牽一線却顧汝漠平南來獨飛馬  
居民異風氣自古習耕戰上論召公奭禮樂比姬旦  
次稱望諸君術略亞管子丹號無策亦數游俠冠  
割棄何人斯腥臊久不澣哀哉漢唐餘左衽今已半  
王帛非足云子女罹蹈踐區區用戎索久爾縻郡縣  
從來帝王師要在侮亡亂攻堅甚攻玉乘瑕易冰泮  
中原但堂治敵勢要自變會當挽天河洗此生齒萬

趙君偶以微恙乘駝車而行戲贈二絕句

鄰國知公未可風雙駝借與兩輪紅他年出塞三千  
騎卧畫輜車也要公

高屋寬箱虎豹相相逢燕市不相親忽聞中有京華  
語驚喜開簾笑殺人

會仙館二絕句

北嶂南屏恰四周西山微缺放溪流胡人置酒留連  
客頗識峯巒是勝游

嶺上西行雙石人臨溪照水久逡巡低頭似愧南來  
使居處雖高已失身

出山

燕疆不過占北關連山漸少多平田奚人自作草屋  
 住契丹駢車依水泉橐駝羊馬散川谷草枯水盡時  
 一遷漢人何年被流徙衣服漸變存語言力耕分穰  
 世為客賦役希少聊偷安漢奚單弱契丹橫目視漢  
 使心淒然石塘竊位不傳子遺患燕剽逾百年仰傾  
 呼天問何罪自恨遠祖從祿山此皆燕人語也

奚君宅在中京南

奚君五畝宅封戶一成田故壘開都邑遺民雜漢編  
 不知臣僕賤漫喜殺生權燕俗嗟猶在婚姻未許連

惠州傳聞南朝逃叛者多在其間

孤城千室閉重闔蒼莽平川絕四鄰漢使塵來空極  
 目沙場雪重欲無春羞歸應有李都尉念舊可憐徐  
 舍人會逐單于渭橋下歎呼齊拜屬車塵

神水館寄子瞻兄四絕十一月二十六日是大風

少年病肺不禁寒命出中朝敢避難莫倚皂貂欺朔  
 雪更催靈火煮鉛丹馬上作法似有力

夜雨從來相對眠茲行萬里隔胡天試依北斗看南  
 斗始覺吳山在目前

誰將家集過幽都逢見胡人問大蘇莫把文章動蠻

集 卷十六 十一  
猶恐妨談笑卧江湖

虜延一意向中原言語綢繆禮亦虔顧我何功慙陸  
賈橐裝聊復助歸田

木葉山

奚田可耕鑿遼土直沙漠蓬棘不復生條幹何由作  
茲山亦沙阜短短見叢薄冰霜葉隨盡鳥獸紛無託  
乾坤信廣大一氣均美惡胡爲獨窮陋意似鄙夷落  
民生亦復爾詬汙不知作君看齊魯間桑枯皆沃若  
麥秋載萬箱蠶老簇千箔餘梁及狗彘衣被遍城郭  
天工本何心地力不能博遂令堯舜人獨不施禮樂

虜帳

虜帳冬住沙陀中索羊織葦稱行宮從官星散依冢  
阜氊廬窟室欺霜風春梁煑雪安得飽擊兎射鹿夸  
強雄朝廷經畧窮海宇歲遺繒絮消頑凶我來致命  
適寒苦積雪向日堅不融睖翻歲旦有來使屈指已  
復過奚封禮成即日卷廬帳釣魚射鵝滄海東秋山  
旣罷復來此往返歲歲如旋蓬彎弓射獵本天性拱  
手朝會愁心曾甘心五餌隨吾術勢類畜馬游樊籠  
祥符聖人會天意至今燕趙常耕農爾曾飲食自謂  
得豈識圖霸光和戎

十日南歸馬上口占呈同事

南轅初喜去龍庭入塞猶須閱月行漢馬亦知歸意  
速朝暘已作故人迎經冬舞雪長相避屈指新春旋  
復生想見雄州饋生菜菜盤酪粥任縱橫

傷足

少年謬聞道直往寡所疑不知避礙嶮造次逢顛危  
中歲飽憂患進退每自持長存鄙夫計未免達士嗤  
前日使胡罷晝夜心南馳中塗冰寒川滉漾無津涯  
僕夫執轡前我心志止之馬眩足不禁拉然卧中抵  
異域非所息據鞍幾不支昔嘗誦楞嚴聞有乞食師

行乞遭毒刺痛劇侵肝脾念覺雖覺痛無痛痛覺知  
念極良有見遂與凡夫辭我今亦悟此先佛豈見欺  
但爾不即證欲往常遲遲咄哉後來心當與初心期

春日寄內

春到燕山水亦消歸驂迎日喜嫖姚久行胡地生華  
髮初試東風脫弊貂挿髻小幡應正爾點槃生菜爲  
誰挑附書勤掃東園雪到日青梅未滿條

渡桑乾

北渡桑乾水欲結心畏窮廬三尺雪南渡桑乾風始  
和水開易水應生波窮廬雪落我未到到時堅白如

磐陀會同出入凡十日腥羶酸薄不可食羊脩乳粥  
差使人風隧沙場不宜客相構走馬渡桑乾旌旆一  
返無由還胡人送客不忍去久安和好依中原年年  
相送桑乾上欲話白溝一惆悵

送文太師致仕還洛三首

國老無心豈為身五年朝謁慰簪紳元臣事業通三  
世舊將威名服四鄰遍閱後生真有道欲談前事恐  
無人比公惟有凌雲檜歲歲何妨雨露新  
齊魯元勳古太師寂寥千載恐無之昔歸斃縮經邦  
手復起還當問道時入謁何曾須掖侍到家依舊擁

旄麾孔公靈壽固應在秋晚香山訪佛祠

西都風物漢唐餘天作溪山養退居盈尺好花扶几  
杖拂天脩竹倚庭除白頭伴侶誰猶健率意壺殮夕

已踈公昔與司馬公同居洛下常與諸老我欲試求

三畝宅從公宅日賦歸歟先人昔游洛中有小築之

未暇

李公麟陽關圖二絕

百年摩詰陽關語三疊嘉榮意外聲誰遣伯時開縞  
素蕭條邊思坐中生

西出陽關萬里行彎弓走馬自忘生不堪未別一盃

酒長聽佳人泣渭城

學士院端午帖子二十七首

皇帝閣六首

溽暑避華構清風迎早朝  
楓槐高自舞冰雪晚初消

又

南訛初應曆五日未生陰  
靈藥收農錄薰風拂舜琴

又

皇心本夷曠一氣自炎涼  
不廢荆吳舊民風見未央

又

九門已散秦醫藥百辟初頒凌室冰  
飲食祈君千萬

壽良辰更上辟兵繒

雨遲麥粒尤堅好日麗蠶絲轉細長  
入夏民間初解

愠宮中時舉萬年觴

汴上初無招屈亭沅湘近在國南垞  
太官漫解供新糗諫列猶應記獨醒

太皇太后閣六首

決獄初迎雨開倉旋取陳青黃  
今接夏飢疫免憂春

又

簾密風時度宮深日倍長  
紵羅隨節賜黍麥趁新嘗

又

執熱寧忘濯清心白釋煩東朝聞好語畏日解餘暄

又

出磨玉塵除舊廩捧箱綵縷看新絲一年豐樂今將  
半兩殿歡聲外得知

舟楫喧呼招屈處禽魚鼓舞放生中百官却拜臯羨  
賜肉去方知舜有功

玉殿清虛過暑天草廬煩促念民編外家近許遷新  
宅不遣司農費一錢

皇太后閣六首

壽康朝謁蚤長信燕閒多不有圖書樂其如晝漏何

又

玉宇宜朱夏壺冰生晚涼深心念行暘清夜爰焚香

又

蠶宮罷採擷暴室獻朱黃翕呷霜紈動闌班綵縷長

又

六宮無事著嬉游百藥初成及早收菖歎還羞十二  
節椿年自占八千秋

萬壽仍縈長命縷虛心不著赤靈符民間風俗疑當  
共天上清高定爾無

揚子江心瀉鏡龍波如細縠不搖風宮中驚捧秋天



月長照人心助至公

皇太妃閣五首

曉起鐘猶疑朝回露欲乾  
逡巡下清蹕委曲問平安

又

壓蔗出寒漿敲冰簇畫堂  
人間正祥暑天上絕清涼

又

九夏清齋奉至尊消除癘疫去無痕  
太醫爭獻天師艾瑞霧長縈堯母門

紈扇新裁冰雪餘清風不隔紵羅疎  
飛昇漫寫秦公子榮謝應憐漢婕妤

渺渺金河入禁垣漸臺雨過碧波翻  
共傳太液龍舟穩不似南方兢渡喧

夫人閣四首

脩厦欺晴日重簾度細風羣仙不煩促  
長在廣寒宮

又

尋芳空茂木闢草得幽蘭歌舞織絺健  
嬉游玉佩珊

又

新煮青筠稻米香旋抽獨蟹薄羅光剩  
堆雕俎添崖蜜爭作輕衫薦壽觴

御溝遶殿細舞新飛灑彤墀曉氣清開  
到石榴花欲

盡陰陰高柳一彈鳴

次韻門下劉侍郎直宿寄蘇左丞

雷雨連年起卧龍穆然臺閣有清風一時畫諾雖云  
舊此日都俞本自公松竹經霜俱不改塩梅共鼎固  
非同一篇和東西府六律更成十二宮

次韻張耒學士病中二首

一卧憐君三十朝呼醫仍苦禁城遥靈根自逐新陽  
發病耕從經野火燒吻燥未須尋麩蘖囊空誰與典  
絺蕉何時匹馬隨街鼓睡起頻驚髀肉消  
塵垢汗人朝復朝病中吟嘯夜方遥長空鴈過疑相

蒼虛幌螢飛坐恐燒稍覺新霜試松竹未應寒雨敗  
梧蕉從來百鍊身如劍火滅重磨未遽銷

次韻張君病起二首

壯年得疾勢能支不廢霜螯左手持漸喜一杯番好  
客未應五斗似當時口中舌在時聞句雪裏心安不  
問師去卧淮陽從病守功名他日許君期  
老去生經廢不行鏡中白髮見空驚解將冲氣通枯  
指易甚新陽發舊莖一悟少年難久恃不妨多病却  
長生文章繆忝推前輩服食從來亦強名

樂城集卷第十六

樂城集卷第十七

賦八首

巫山賦

過瞿唐之長江兮蔚巫山之嵯峨雲孤興其勃勃兮  
 北風慨其揚波山嶽崮而直上兮越至神女之所家  
 峯連屬以十二兮其九可見而三不知蹊遂蕪滅而  
 不可陟兮玄猿黃鵠四顧而鳴悲覽松柏之青青兮  
 紛其若江上之菰蒲維其大之不可知兮有櫂雲之  
 脩柯蔓草蒙茸以下翳兮飛泉潔清而無沙亭亭孤  
 峯其下藂木交錯而不明兮若有美人慘然而長嗟



歛手危立以右顧兮舒目遠望恍然而有所懷儼峨  
峨其有禮兮盛服寂寞而無譁臨萬仞之絕嶮兮獨  
立千載而不下顛追懷楚襄之放意肆志兮泝江千  
里而遠來離國去俗兮徘徊而不能歸悲神女之不  
可以朝求而夕見兮想遊步之逶遲築陽臺於江干  
兮相氛氣之參差惟神女之不可以求得兮此其所  
以爲神湛洋洋其無心兮豈其猶有懷乎世之人朝  
雲蔚其晨興兮暮雨紛以下注變化倏忽不可測兮  
俄爲鳥而騰去忽然而爲人兮佩玉鏘以琅琅愛江  
流之清波兮安燕處乎高唐彼蛟龍之多智兮尚不

可執以冒高丘深其蒼蒼兮恍誰識其有無

屈原廟賦

淒涼兮穉歸寂寞兮屈氏楚之孫兮原之子伉直遠  
兮復誰似宛有廟兮江之浦予來斯兮酌以醕吁嗟  
神兮生何喜九疑陰兮湘之涘鼓桂楫兮蘭爲舟橫  
中流兮風鳴厲忽自溺兮曠何求野莽莽兮舜之丘  
舜之牆兮繚九周中有長遂兮可駕以遊揉玉以爲  
輪兮斲冰以爲之軸伯翳俯以御馬兮皋陶爲予參  
乘慘然愍予之強死兮泫然涕下而不禁道予以登  
夫重丘兮紛古人其若林悟伯夷以太息兮焦衍爲

予而歔歔古固有是兮予又何怪乎當今獨有謂予之不然兮夫豈柳下之展禽彼其所處之不同兮又安可以謗予抱關而擊析兮余豈責以必死宗國鄭而不救兮夫子余是安去予將質以重華兮蹇將語而出弟子豈如彼婦兮夫不仁而出訴慘默默予何言兮使重華之自爲處予惟樂夫揖讓兮坦平夷而無憂朝而從之遊兮顧子使予昌言言出而無忌兮暮還寢而燕安嗟平生之所好兮既死而後能然彼鄉之人兮孰知予此歡忽反顧以千載兮喟故宮之頽垣

缸硯賦

并叙

先蜀之老有姓滕者能以藥煑瓦石使軟可割如土嘗以破釀酒缸爲硯極美蜀人往往得之以爲異物余兄子瞻嘗遊益州有以其一遺之子瞻以授余因爲之賦

有物於此首枕而足履大胷而大膺杯首而箕制其壽百年骨肉破碎而獨化爲是其始也生乎黃泥之中其成也出乎烈火之下尾銳而腹皤長頸而巨口舖糟啜酒終日醉飽外望中虛膚密理解偶與物鬪脅漏內稿棄於路隅瓦礫所汝忽然逢人藥石包裹

不我謂瑕治以鼎鼐烹煎不辭斧鑿見剖一爲我形  
沃我以水汙我以煤處我以几子旣博物之識已否  
客曰嗟夫物之成也則必固有毀也邪物之毀也則  
又不可謂棄也邪旣成而毀者悲其棄也旣棄而復  
用者又悲其用也是亦大惑而已矣且以予觀之昔  
子則非開口而受濕如辛含酸而不得守子之性者  
邪今子則非坦腹而受污糝糊彌漫而不得保子之  
正者邪且其飲子以水也不若飲子以酒以物汙子  
也不若使子自保子果以此自悲也則亦不見夫諸  
毛之捽拔諸楮之爛靡殺身自鬻求效於此吐詞如  
矣

登真興寺樓賦

季夏六月子瞻與張戶曹琥同遊真興寺晚登寺  
後重閣南望連山如畫山前有白鷺十數杳杳飛  
去東南望五丈原原上有白雲如覆釜慨然思孔  
明之遺迹作書與轍曰可以賦此賦曰

涉六月之徂暑兮遡秦川而遠望樓馮高而遽遽兮  
日將薄乎西方牛羊相從而下來兮孤煙特起於蒼

茫南望連山之參差兮奔走相屬而騰躩桀業峨其  
雄高兮惟太白與終南林阜蔚以扶拱兮浩合沓而  
穰穰若羣馬之相追逐兮忽鬱怒而狂章駢交首以  
磨頸兮紛絕馳於四方日將入而山陰兮天黝黝而  
茫茫淡平雲之凝碧兮白鷺歸以翺翔裊裊其彌遠  
兮聲斷絕而復揚眇將沒而猶見兮飄若仙人之不  
可望曠羣歸於何所兮徂南澗之泱泱回東望夫脩  
隆兮隱高原曰五丈思古人而不可見兮涕橫流以  
浪浪雲塊軋其不起兮若覆釜而在上嗟一日之所  
見兮蓋千變以異狀忽已去而莫執兮夫豈勝乎追

想強馳詞於千里兮增異日之惆悵維古事之亦然  
兮偶一世之所向非有意於求慕兮徒今世之追賞  
雖孔明其何益於五丈兮使無原其忘亮覽川原而  
思古兮况亡弓之遺轍

超然臺賦 并叙

子瞻既通守餘杭三年不得代以轍之在濟南也  
求為東州守既得請高密其地介於淮海之間風  
俗朴陋四方賓客不至受命之歲承大旱之餘孽  
驅除螟蝗逐捕盜賊廩卹飢饉日不遑給幾年而  
後少安顧居處隱陋無以自放乃因其城上之廢

臺而增葺之日與其僚覽其山川而樂之以告轍  
曰此將何以名之轍曰今夫山居者知山林居者  
知林耕者知原漁者知澤安於其所而已其樂不  
相及也而臺則盡之天下之士奔走於是非之場  
浮沉於榮辱之海囂然盡力而忘友亦莫自知也  
而達者哀之二者非以其超然不累於物故邪老  
子曰雖有榮觀燕處超然嘗試以超然命之可乎  
因爲之賦以告曰

東海之濱日氣所先巋高臺之陵空兮溢晨景之繁  
鮮幸氛翳之收霽兮逮朋友之燕閒舒堙鬱以延鑿

兮放遠目於山川設金壘與玉竿兮清醪絜其如泉  
奏絲竹之憤心兮聲激越而眇縣下仰望而不聞兮  
微風過而激天曾陟降之幾何兮棄溷濁乎人間倚  
軒楹以長嘯兮袂輕舉而飛翻極千里於一瞬兮寄  
無盡於雲煙前陵阜之洶湧兮後平野之澌漫喬木  
蔚其蓊蓊兮興亡忽乎滿前懷故國於天未兮限東  
西之嶮艱飛鴻往而莫及兮落日耿其夕躔嗟人生  
之漂搖兮寄流枿於海壖苟所遇而皆得兮遑旣擇  
而後安彼世俗之私已兮每自予於曲全中變潰而  
失故兮有驚悼而汎瀾誠建觀之無不可兮又何有



於憂患顧遊宦之迫隘兮常勤苦以終年盍求樂於  
一醉兮滅膏火之焚煎雖晝日其猶未足兮埃明月  
乎林端紛旣醉而相命兮霜凝磴而跼躅馬躑躅而  
號鳴兮左右翼而不能鞍各雲散於城邑兮徂清夜  
之旣闌惟所徃而樂易兮此其所以爲超然者邪

服茯苓賦

并叙

余少而多病夏則脾不勝食秋則肺不勝寒治肺  
則病脾治脾則病肺平居服藥殆不復能愈年三  
十有二官於死丘或憐而受之以道士服氣法行  
之暮年二疾良愈蓋自是始有意養生之說晚讀

抱朴子書言服氣與草木之藥皆不能致長生古  
神仙真人皆服金丹以爲草木之性埋之則腐煑  
之則爛燒之則焦不能自生而况能生人乎余旣  
汨沒世俗意金丹不可得也則試求之草木之類  
寒暑不能移歲月不能敗者惟松栢爲然古書言  
松脂流入地下爲茯苓茯苓又千歲則爲琥珀雖  
非金石而其能自完也亦久矣於是求之名山胥  
而瀹之去其脉絡而取其精華庶幾可以固形養  
氣延年而却老者因爲之賦以道之詞曰

春而榮夏而茂憔悴乎風霜之前摧折乎冰雪之後

閱寒暑以同化委糞壤而蕪朽茲固百草之微細與  
衆木之凡陋雖復效骨革於刀几盡性命於杵臼解  
急難於俄頃破奇邪於邂逅然皆受命淺薄與時變  
遷朝菌無日蟪蛄無年苟自救之不暇矧他人之足  
延乃欲擷根莖之么末假臭味以登仙是猶託疲牛  
於千里駕鳴鳩而升天則亦辛勤於澗谷之底槁死  
於峯崖之顛顧桑榆以竊歎意神仙之不然者矣若  
夫南澗之松拔地千尺皮厚犀兕心堅鐵石鬚髮不  
改倉然獨立流膏液於黃泉乘陰陽而固結象鳥獸  
之蹲伏類龜鼈之閉蟄外黝黑以鱗皴中潔白而純

密上灌莽之不犯下螻蟻之莫賊經歷千歲化爲琥  
珀受雨露以彌堅與日月而終畢故能安寃鬼而定  
心志却五味與穀粒追赤松於古上以百歲爲一息  
顏如處子綠髮方目神止氣定浮遊自得然後乘天  
地之正御六氣之辨以遊夫無窮夫又何求而何食

墨竹賦

與可以墨爲竹視之良竹也客見而驚焉曰今夫受  
命於天賦刑於地涵濡雨露振蕩風氣春而萌芽夏  
而解弛散柯布葉逮冬而遂性剛絜而踈直姿嬋娟  
以閑媚涉寒暑之徂變傲冰雪之凌厲均一氣於草

木嗟壤同而性異信物生之自然雖造化其能使今  
子研青松之煤運脫兔之毫睥睨牆堵振洒繒繡須  
臾而成鬱乎蕭騷曲直橫斜穠纖庫高竊造物之潛  
思賦生意於崇朝子豈誠有道者耶與可聽然而笑  
曰夫子之所好者道也放乎竹矣始予隱乎崇山之  
陽廬乎脩竹之林視聽漠然無槩乎予心朝與竹乎  
為游莫與竹乎為朋飲食乎竹間偃息乎竹陰觀竹  
之變也多矣若夫風止雨霽山空日出倚倚其長森  
乎滿谷葉如翠羽筠如蒼玉澹乎自持淒苟欲滴蟬  
鳴鳥噪人響寂歷忽依風而長嘯眇掩冉以終日荈

蕪茅館

山居少華麗牽茅結淨屋此間不受塵幽人亦新沐  
瓔珞巖

棲雲室

泉流逢石缺脉散成寶網水神瓔珞看山是如來想  
石室空無主浮雲自去來人間春雨足歸意帶雷風  
秘全庵

延華洞

世道自破碎全理未常違溪山亦何有求覺平日非  
共恨春不長逡巡就搖落一見洞中天真知世間惡

重  
負九板  
黃樓陸  
序可步  
宋之  
補錄

澄元谷

石門日不下潭鏡月長臨細細溪風渡相看識此心

雨花巖

巖花不可攀翔藥久未墮忽下幽人前知子觀空坐

泠泠谷

層崖落飛泉微風泛喬水坐遣谷中人家家有琴箏

玉龍峽

白龍晝飲潭脩尾掛石壁幽人欲下看雨電晴相射

觀音巖

倚崖開翠屏臨潭置苔石有所獨無人君心得未得

於城上調急夫發禁卒以從事令民無得竊出避  
水以身帥之與城存亡故水大至而民不潰方水  
之淫也汗漫千餘里漂廬舍敗冢墓老弱蔽川而  
下壯者狂走無所得食槁死於丘陵林木之上子  
瞻使習水者浮舟楫載糗餌以濟之得脫者無數  
水既涸朝廷方塞澶淵未暇及徐子瞻曰澶淵誠  
寒徐則無害塞不塞天也不可使徐人重被其患  
乃請增築徐城相水之衝以木堤捍之水雖復至  
不能以病徐也故水既去而民益親於是即城之  
東門爲大樓焉堊以黃土曰土實勝水徐人相勸

成之轍方從事於將宋登黃樓覽觀山川弔水之  
遺迹乃作黃樓之賦其詞曰

子瞻與客遊於黃樓之上客仰而望俯而歎曰噫嘻  
殆哉在漢沅光河決瓠子騰蹙鉅野衍溢淮泗梁楚  
受害二十餘歲下者爲汙澤上者爲沮洳民爲魚鼈  
郡縣無所天子封祀太山徜徉東方哀民之無辜流  
死不藏使公卿負薪以塞宣房瓠子之歌至今傷之  
嗟惟此邦俯仰千載河東傾而南洩蹈漢世之遺害  
包原隰而爲一窺吾壩之摧敗呂梁齟橫絕乎其前  
四山連屬合圍乎其外水洄洑而不進環孤城以爲

海舞魚龍於瑤壑閱帆檣於睥睨方飄風之迅發震  
鞞鼓之驚駭誠蟻穴之不救分閭閻之橫潰幸冬日  
之旣迫水泉縮以自退棲流枿於喬木遺枯蚌於水  
裔聽澶淵之奏功非天意吾誰賴今我與公冠冕裳  
衣設几布筵斗酒相屬飲酣樂作開口而笑夫豈偶  
然也哉子瞻曰今夫安於樂者不知樂之爲樂也必  
涉於害者而後知之吾嘗與子馮茲樓而四顧覽天  
宇之宏大繚青山以爲城引長河而爲帶平臯衍其  
如席桑麻蔚乎旆旆畫阡陌之從橫分園廬之向背  
放田漁於江浦散牛羊於煙際清風時起微雲霽對

山川開闔蒼莽千里東望則連山參差與水皆馳羣石傾奔絕流而西百步湧波舟楫紛披魚鼈顛沛沒人所嬉聲崩震雷城堞爲危南望則戲馬之臺巨佛之峯巋乎特起下窺城中樓觀翺翺鬼峨相重激水既平眇莽浮空駢洲接浦下與淮通西望則山斷爲玦傷心極目麥熟禾秀離離滿隰飛鴻群往白鳥孤沒橫煙澹澹俯見落日北望則泗水滌漫古汴入焉匪爲濤淵蛟龍所蟠古木蔽空烏鳥號呼賈客連檣聯絡城隅送夕陽之西盡導明月之東出金鉦湧於青嶂陰氛爲之辟易窺人寢而直上委餘彩於沙磧

激飛楹而入戶使人體寒而戰栗息洶洶於羣動聽川流之蕩潏可以起舞相命一飲千石遺棄憂患超然自得且子獨不見夫昔之居此者乎前則項籍劉戊後則光弼建封戰馬成羣猛士成林振臂長嘯風動雲興朱閣青樓舞女歌童勢窮力竭化爲虛空山高水深草生故墟蓋將問其遺老旣已灰滅而無餘矣故吾將與子弔古人之旣逝閔河決於疇昔知變化之無在付杯酒以終日於是衆客釋然而笑頽然就醉河傾月墮攜扶而出

卷第十七

欒城集卷第十八

辭五

御風辭題鄒州  
列子祠

子列子行御風風起蓬蓬朝發於東海之上夕散於  
西海之中其徐冷然其怒勃然衝擊隙穴震蕩宇宙  
披拂草木奮厲江海強者必折弱者必從俄而休息  
天地肅然塵壒皆盡欲執而視之不可得也蓋歸於  
空今夫子晝無以食夜無以寢鄰里忽之弟子疑之  
則亦鄭東野之窮人也然而徐行不見徒步疾行不  
見車馬與風皆逝與風皆止旬有五日而後反此亦

何功也哉子列子曰嘻子獨不見夫衆人乎貧者葺蒲以爲履斲柳以爲屐富者伐檀以爲輻豢駟以爲服因物之自然以致千里此與吾初無異也而何謂不同乎苟非其理屨屐足以折趾車馬足以毀體萬物皆不可御也而何獨風乎昔吾處乎蓬蒿之間止如枯株動如槁葉居無所留而往無所從也有風瑟然拂吾廬而上攝衣從之一高一下一西一東前有飛鳶後有遊鴻雲行如川奕奕溶溶陰陽變化顛倒橫從不眎海嶽晃蕩青紅蓋雜陳於吾前者不可勝窮也而吾方黜聰明遺心胷足不知所履手不知所

馮澹乎與風爲一故風不知有我而吾不知有風也蓋兩無所有譬如風中之飛蓬耳超然而上薄乎雲霄而不以爲喜也拉然而下隕乎坎井而以爲凶也夫是以風可得而御矣今子以子爲我立乎大風之隧凜乎恐其不能勝也蹙乎恐其不能容也手將執而留之足將騰而踐之目眩耀而憂墜耳洶湧而知畏紛然自營子不自安而風始不安子躬矣子輕如鴻毛彼將以爲千石之鍾子細如一指彼將以爲十仞之墉非傾而覆之拔而投之不厭也况欲與之道遙翱翔放於太空乎子雖蹈后土而倚蒿華亦將有



時而窮矣古之至人入水而不濡入火而不熱苟爲  
無心物莫吾攻也而獨疑於風乎於是客起而歎曰  
廣矣大矣子之道也吾未能克之矣風未可乘姑乘  
傳而東乎

上清辭

宮在大白山  
子瞻作

帝蕩蕩其無尊兮居深高乎九閭顧后土之茫昧兮  
若世人之觀天雲冥冥其無見兮曰其下維神姦山  
重深而海廣兮憂百鬼之傷人屬神媪以九土兮界  
海若以九川時節降以督視兮下斗鬼之神君吁嗟  
君兮吾不可得而訊也庸使我待之人兮其使我以

爲神也朝求兮山顛夕采兮澗涘取荷華兮菱實拾  
芳蘭兮白芷鹿伎伎兮來置魚揖揖兮趨餌秋風高  
而稻熟兮寒泉冽其清泚爲酒醴以跪酌兮斲白茅  
而爲委嗟天上其何食兮畏神君之不吾以進屏息  
以薦恪兮退俯偃而仰俟爲善得福兮畀惡以死恐  
懼受賜兮怠傲獲罪玉食有不享兮會潢汙蕪薇之  
不棄謂神君之不可知兮何好惡之吾似跨脩龍之  
百尋兮騰怒髮而上指從千騎之飄忽兮拂長劍其  
天倚殞星殃於太極兮霍雲散而風靡還祕殿之清  
深兮目流電其不可仰視望威神而股栗兮知其中

之人耳致吾有以薦誠今庶其可得而祀也

楊樂道龍圖哀辭 并叙

嘉祐五年三月轍始以選人至流內銓是時楊公樂道以天章閣待制調銓之官吏見予於稠人中曰聞子求舉直言若必無人畋願得備數轍曰唯旣而至其家一見坐語如舊相識明年予登制科公以諫官為考官祕閣又明年四月公薨方其病也予見於其寢莫然無言曰死矣將以寂滅為樂蓋予之識公始三歲矣三歲之中不過數十見公齒甚長予甚少公已貴子方貧賤見之輒歡樂笑

語終日不厭釋然忘其老且貴也

相與痛惜其不幸而予又竊有以私懷之公本河東人家世將家有功於國公始以文詞得官其後將兵南方與蠻戰亦有功其為將能與士卒均勞苦飲食比其最下者而軍行常處其先以此得其死力常學李靖兵法知其出入變化之節其稱曰今之人才不及古人多將輒為所昏嘗於南方以數千卒自試自度可以復益數千人而不亂然公之與人謹畏循循無所迂平居遇小事若不能決人皆怪其能將以破賊疑其無以處之不知其中

有甚勇者人不及也蓋其謹畏循循者所以爲勇  
而人莫知之卒時年五十有六素病瘦甚羸然平  
居讀書勤苦過於少年好爲詩喜大書皆可愛有  
子一人生始二歲將卒名之曰祖仁旣卒家無遺  
財以故衣歛仰於官及其友人以葬以克養其家  
將以七月葬于洛陽五月其家以其柩歸作哀辭  
以遺其紼者歌之辭曰

嗟夫楊公歸來兮洛之上其土厚且溫生年五十六  
有子以祭兮何慕而不若人天子憐爾贈金孔多兮  
家可以不貧平生不爲惡死而有遺愛兮雖亡則存  
家本將家有功而不墜兮配祖以孫爲人至此非有  
不足兮可以無憾而人爲悲辛嗟夫楊公歸來兮家  
有弱子恃爾神

劉凝之屯田哀辭

并叙

元豐三年九月辛未廬山隱居劉凝之卒于山之  
陽其孤格書來赴曰君昔知吾兄旣又識吾父今  
不幸至於大故其爲詩使授者歌之以厚其葬十  
月乙酉葬于清泉鄉書不時至緩不及事乃哭而  
爲之辭始于自蜀遊京師識凝之長子恕道原博  
學強識能通三墳五典春秋戰國歷代史記下至

五代分裂皆能言其治亂得失紀其歲月辨其氏族而正其同異上下數千歲如指諸左右其爲人剛中少容是是非非未嘗以語假人人多疾之翰林學士司馬公方受詔紬書東觀以君爲屬公以直名當世而君尤甚雖公亦嚴憚之士知君者曰君非獨然君父凝之始以剛直不容於世俗棄官而歸老於廬山二十年矣君亦非久於此者也旣而君得請以歸養其親三年得疾不起今年春予以罪謫高安過君之廬傷君之不復見拜凝之於牀下其容粹然以溫其言肅然以厲環堵蕭然饘

粥以爲食而遊心塵垢之外超然無感感之意凜乎其非今世之士也然予之見凝之始得道士法卻五穀煑棗以爲食氣清而色和及其沒也晨起衣冠言語如平時無疾而終予然後知君父子皆有道者然道原一斤不用遂往而不能返凝之隱居絕俗三十餘年神益疆氣益堅盡其天年物莫能傷其清則同而其曠達自遂道原不及也辭曰伯夷之清百世而一人兮其生也薇以爲食餓死於首陽世之士謂清不可爲兮計較得失以和爲臧信和之可以浮沉而自免兮彼爲和者何三黜之皇皇

日為道者不與命謀兮非和實得非清實喪若凝之  
為父與原之為子兮絜廉不撓冰清而玉剛如世之  
言當皆折兮原何獨短凝何獨長要長短之不可以  
命人兮適天命之不可常惟溷濁之不可居而徇絜  
之難久兮吾將與疑乎同鄉

鮮于子駿諫議哀辭

中山鮮于子駿弱冠而仕老而不得志買田於陽  
翟蓋將終焉元祐元年始召為諫議大夫朝廷以  
得人相慶而子駿亦不敢以老為辭意將有所建  
焉居數月得足疾不能造朝即自引去得請淮陽

未幾以不起聞士之識與不識皆為之出涕夫死  
生得喪非子駿之憂而有志不獲為可悲也子駿  
於書無所不讀而善屬文晚節為楚詞得古之遺  
思其文與蜀郡文與可相上下與可沒將十年而  
子駿亡蜀人皆悲思之其子頡求予為挽歌作楚  
辭以授之以為子駿之意也

登蒿高兮捫天涉清潁兮波瀾中休息兮故韓有美  
人兮來居曳佩玉兮長裾內諒直兮外脩車還軫兮  
莫予留築室兮疏流植榦兮蔣芳雪積兮中谷曰予  
俟兮春暘春風至今兮百鳥鳴升高禾兮兩亦晴鳴一

再兮驚人時不予兮徂征美人兮駕長離來逡巡兮  
往奔馳命不可兮柰何號帝閭兮訴予予騫木蘭兮  
茹紫芝予飲石泉兮濯流波不妄食兮裴回莫之飽  
兮不飢游於斯兮伏斯命有盡兮孰違心不滅兮亭  
亭倚嵩少兮長歎

詩二首

太白山祈雨詞同子瞻作

田漫漫耕挹挹拔陳草生九穀人功盡雨則違苗不  
穗莩不米哀將飢兮  
山巖巖奠南西嗟我民匪神依伐山木執糗黍求既

多訴不已猶我許兮

山爲灰石爲炭水泉沸百苦爛神予我旱奪之孰爲  
是驕不威尚可弛兮

雷馮空雨騰淵誅孽妖反豐年顧千里瞬三日神在  
堂龍爲役是何惜兮

雨旣止百穀復築場壤治困麗爲酒醴伐豚羔舞長  
袖擊鳴鼉匪以報兮

舜泉詩 并叙

始余在京師遊宦貧困思歸而不能聞濟南多甘  
泉流水被道蒲魚之利與東南北東方之人多稱

之會其郡從事闕求而得之既至大旱幾歲赤地  
千里渠存而水亡問之其人曰城南舜祠有二泉  
今竭矣越明年夏雖雨而泉不作人相與驚曰舜  
其不復享耶又明年夏大雨霖麥禾荐登泉始復  
發民驩曰舜其尚顧我哉泉之始發猶爲二池醜  
爲石渠自東南流於西北無不被焉濯濯播灑蒲  
蓮魚鼈其利滋大因爲詩使祠者歌之詩曰

歷山崑崙虞舜宅焉虞舜徂矣其神在天其德在人  
其物在泉神不可親德用不知有冽斯泉下民是祗  
泉流無疆有求我思源發于山施于北河播于中遷

匯爲澄波有鼈與魚有菱與荷蒞毒是洩汗濁以流  
埃塏消亡風火滅收藜木敷榮勞者所休誰爲旱災  
靡物不傷天地耗竭泉亦淪亡民咸不寧曰不享耶  
時雨旣澍百穀旣登有流泫然彌坎而升溝洫滿盈  
鰕黽沸騰匪泉實來帝實顧余執其羔豚蘋藻是蒞  
帝今在堂泉復如初

銘二首

彭城漢祖廟試劍石銘

漢高皇帝廟有石高三尺六寸中裂如破竹不盡  
者寸父老曰此帝試劍石也熙寧十年蜀人蘇軾

爲彭城守弟轍實從入廟觀石而爲之銘曰  
維漢之興三代無有提劍一呼豪傑奔走厥初自試  
山石爲剖夜斷長蛇且泣神母指麾東西秦項授首  
歛然三尺一夫之偶大人將之山嶽頽仆用巨物靈  
不復凡手武庫焚蕩帝命下取巋然斯石不尚有舊

鳳唵石硯銘

北苑茶冠天下歲貢龍鳳團不得鳳凰山唵潭水  
則不成潭中石蒼黑堅緻如玉以爲研與筆墨宜  
世初莫知也熙寧中太原王頤始發其妙吾兄子  
瞻始名之然石性薄厚者不及寸最後得此長博

豐碩蓋石之傑子瞻方爲易傳日効於前與有功  
焉爲之銘曰

陶土塗鑿崖石玄之蠹頰之賊涵清泉閟重谷聲如  
銅色如鐵性滑堅善凝墨棄不取長歎息招伏羲揖  
西伯發秘藏與有力非相待誰爲出

頌二首

筠州聰禪師得法頌并叙

禪師聰公昔以講誦爲業晚游淨慈本師之室誦  
南嶽思大本和尚口吞三世諸佛語迷悶不能入  
一日爲本燒香本曰吾疇昔爲汝作夢甚異汝不



悟即死不可不勉師茫然不知所謂既而禮僧伽  
像醒然有覺知三世可吞無疑也趨往告本本曰  
向吾夢汝吞一世界一剝刀汝今日始從迷悟是  
始出家真吾子也乃擊鼓升座爲衆說此事聰作  
禮涕泣而罷聰住高安聖壽禪院予嘗從之問道  
聰曰吾師本公未嘗以道告人皆聽其自悟今吾  
亦無以告予予從不告門人而入道乃爲頌曰  
道不可告告即不得以不告告是真告救香嚴辭去  
得之瓦礫臨濟不喻至愚而悉非愚非瓦皆汝之力  
有不至此是非出家夢吞剝刀髮落如花遊行四方

物莫能遮終亦不告獨障其邪弟子度者如恒河沙  
等軒頌

南豐張君家有等軒問我何者是平等法我告張君  
物之不齊何所不有長短大小淨穢好醜雜然首陳  
參差不等亂我身心耳目鼻口欲求平等了不可得  
忽然覺知身心本空萬物亦空諸差別相皆是虛妄  
無有失性孰爲不等等爲一空尚無平等何處復有  
不平等者遍觀萬物無等不等是謂真實平等法已

樂府集卷第十八



